

*Prof.dr Duško Vejnović, redovni profesor Univerziteta u Banjoj Luci*

## **POLITIKA NEOLIBERALIZMA I NEODGOVORNOSTI RUŠI BiH**

**Parola-neka tržište upravlja svime, sprega politike i korporacija koju treba kritikovati-sloboda je najveća vrijednost**

Političari u Republici Srpskoj i Bosni i Hercegovini narode zabavljaju sporednim stvarima i na taj način manipulišu demokratijom na isti način kako su to činili s tržištem i privatizacijom koja je završila kao velika pljačka društvenog bogatstva u interesu pojedinaca i grupa. "Inteligentna manjina" vlada i vodi zemlju u interesu kako saopštava cijelog naroda uz poruku... "narodu se ne može prepustiti da donosi odluke, jer će odluke koje će donijeti biti katastrofalne." Ono što oni čine je na određeni način nametanje "prozivodnje pristanka" od strane širokih narodnih masa. Idu sa pretpostavkom da je narod "preglup" da to shvati pa smišljaju način na koji će narod pristati na odluke što ih donosi manjina. Manjina stvara industriju odnosa s javnošću. Taj neoliberalni pristup sprege politike i korporacija treba kritikovati jer "inteligentna manjina" da ne bi morala silom kontroliše narod industrijom odnosa s javnošću kako ističe Nobelovac Noam Čomski. Jedan od najboljih načina da se utiče na tuđe stavove jest ono što je veliki stručnjak iz političke ekonomije Torstajm, Velblen nazvao "fabrikovanje potrošača". Reklamna industrija koju stvara manjina nad narodom samo je vrhunac htjenja fabrikovanja potrošača, zamki konzumerizma- a sve to radi vrlo sofisticirano. Opšte poznato je da ta manjima vlastodržaca kroz marketinšku industriju ne baca novac uzalud. Da to ne radi ljudi bi svrgnuli lažne autoritete, korumpirane političare, autokrate, diktatore, nemoralne pojedince kojih je nažalost sve više. Tako se u politici u Republici Srpskoj i Bosni i Hercegovini sve više razvila reklamna industrija koja prerasta u "psihologiju zanovijetanja". Ti učinci propagande posebno su vidljivi kod djece i starijih lica. **Političari nas zaduživanjem vraćaju u robovlasničku ekonomiju, dužničko-vjeronički odnos.** Neinformisano biračko tijelo donosi iracionalne odluke, vrlo često i protiv vlastitih interesa. Iz političke i sociološke teorije je poznato da bi demokratija trebala da se temelji na dobro informisanim građanima koji donose racionalne odluke. Međutim, industrija odnosa s javnošću vodi političke kampanje tako da do građana stigne jedino površna informacija, iluzija, stvaraju se popularne ličnosti, "lideri", autokrate i često puta nemoralne ličnosti. Oko bitnih pitanja za narod stalno postoji veliko razmimoilaženje između vođenja javne politike i javnog mnijenja. Zato neki političari i neki nosioci javnih funkcija narod zabavljaju sporednim stvarima i na taj način manipulišu demokratijom na isti način kako su to činili i čine s tržištem i privatizacijom. Na taj način se doprinosi opštem marginalizovanju naroda. Atomiziranju ljudi tako da im se pažnja usmjerava i skreće što dalje od onoga što bi im trebalo biti važno, npr., umjesto da žive slobodno, nesputano u demokratskom društvu, jednostavno samo rade za manjinu, za vlast i vlastodršce. Nažalost umjesto da politika bude..." mudrost upravljanja ljudima i stvarima u svrhu ostvarivanja najviših vrijednosti (istine, pravde, slobode, svetosti života, itd.), ona se danas u Bosni i Hercegovini definiše kao ogoljela i krvoločna borba društvenih grupa i pojedinaca za osvajanje, očuvanje i povećanje moći, vlasti i koristi koje ide uz to. Suština politike u BiH je borba oko raspodjele i konrole društvene moći- politika je postala drama. Filozof volje za moć je rekao: došlo je vrijeme da se ponovo promisli šta je politika, jer

ovakva kakva je sada i ovdje, ona je mjesto gdje su sve negativne pojave, izazovi, rizici i prijetnje zakazale sastanak. Sa dovoljno razloga može se reći da su na ovim prostorima BiH još uvijek veoma moćne mitske i paganske predstave i vjerovanja, koja po pravilu oživljavaju u trenucima političkih i društvenih kriza. Kad god se ponove krizne situacije uvijek se obnove ovi mitski i paganski obrasci. U kriznim situacijama ne traži se učitelj nego spasitelj: harizmatički vođa uvijek ima šansu kada nije moguće riješiti krizu na racionalan način što je slučaj i u BiH.” (Vejnović, D. str.54.)

Naučna istraživanja pokazuju da se politika u Bosni i Hercegovini sve više fokusira na privatne interese koje finansiraju preduzeća, kompanije, dok je javnost sasvim marginalizovana. Neoliberalna marketinška industrija moćnih, drskih, često nemoralnih stvara ljude koji će se fokusirati na ispunjenje vlastitih umjesto obećanih i proklamovanih želja građana, naroda i potrošača koji su neinformisani i naviknuti na donošenje iracionalnih odluka. Veliki Čomski razotkriva principe koncentracije moći i bogatstva i ističe da ključnu ulogu odigrava razvoj industrije odnosa s javnošću. Siromaštvo i socijalna nepravda proizvode sve više nejednakosti, a Čomski razotkriva ključne aktere neoliberalizma i pruža jasan, hladan i strpljiv uvid u nepobitne ekonomske činjenice. **On ističe deset principa koncentracije bogatstva i moći koje danas nalazimo u Americi. Ti principi su: suzbijanje demokratije, oblikovanje ideologije, redizajniranje ekonomije, prebacivanje tereta na siromašne i srednju klasu, udar na uzajamnu ljudsku solidarnost, dopuštanje regulatorima da ih vode vlastiti interesi, izborni inženjering, upotreba straha kao i snage države da se masu drži pod nadzorom, proizvodnja pristanka i marginalizovanje građana, naroda.** Političari u Bosni i Hercegovini danas često puta saopštavaju građanima da ne očekuju nikakvu pomoć od države, država je problem, a ne rješenje, itd. To je neoliberalizam u svojoj biti. Posjeduje taj podvojeni karakter koji možemo slijediti unatrag kroz ekonomsku istoriju. Uspostavlja se stanje da jedna pravila vrijede za bogate, a sasvim suprotna pravila vrijede za siromašne. Za siromašne i dalje vrijede tržišni principi, npr. ograničavaju se prava, uništava se zdravstvo i sl. Opasnost za BiH i Republiku Srpsku je kreditna kriza koja je još više produbljena različitim političkim, ekonomskim i svakim drugim malverzacijama i kojekakvim sistemskim provođenjem finansijskih trikova i prevara. Moć se toliko koncentrisala da su neke od banaka favorizovane od političara i države postale “previše velike da bi propale”, nego su, kako je to jedan ekonomist lijepo rekao “previše velike da bi ih se pritvorilo”. Nažalost, kriminalističke istrage uglavnom se po ovim pitanjima vode za trgovinu povlašćenim informacijama, pri čemu je kriminal bio u tome da je škodio tuđim poslovima- s time se uvijek nešto može učiniti. Ali, kada je u pitanju otimačina, zgrabizam, pljačka naroda, to se ne kažnjava. U pravilu u BiH svaki se put poreski obveznici pozivaju da finansiraju one koji su stvorili krizu, a to su u pravilu političari i glavne finansijske institucije. Međutim, to nije ispravno, kriza treba da pomete, počisti one koji su se odvažili na rizična ulaganja. Međutim bogataši i moćnici ne žele kapitalistički sistem, već oni žele da, kada se nađu u nevolji, **država bude u stanju uskočiti poput dadilje**, i da ih tada poreski obveznici finansijski izvuku. Neki poreski obveznici, politički odabrani, posjeduje polisu osiguranja koju im je izdala država, što znači da će ih, bez obzira na to koliko se često odluče na rizike, i ako se nađu u nevolji, javne institucije finansijski izvući, jer su oni preveliki da ih se pusti da propadnu- i to se tako stalno iznova ponavlja. Njihova moć je toliko velika da propadne svaki pokušaj da se tome stane na kraj. **U uslovima Bosne i Hercegovine ljudi koji su određeni, izabrani, da riješe krizu bili su i jesu isti oni koji su do nje doveli.** Oni su do krize doveli, a sada su jači nego ikada prije, moćniji, drskiji, osioni. Je li to slučajno, pa, baš i nije, ako su isti ljudi odabrani da osmisle novi ekonomski plan- šta očekujemo da će se dogoditi? Javne institucije često puta

istresu bilione eura u ruke posrnutih preduzeća politički odabranih i tako njih i sebe održavaju u životu. Najjednostavnija definicija neoliberalizma jest “neka tržište upravlja svime”. Država se ne bavi formiranjem politike osim kao podrška tržišnim aktivnostima. Nažalost, to su mjere koje se primjenjuju na siromašnim i slabima ali ne i na bogatima, moćnima, drskima, ne na sebi. To je tako nažalost u cijeloj modernoj ekonomskoj historiji još od 17-og vijeka iako se to onda nije zvalo neoliberalizam. Političke elite u Bosni i Hercegovini trebaju koristiti “komparativne prednosti” da izvoze svoje osnovne proizvode i da uvoze samo ono što u BiH nedostaje. **Treba favorizovati domaće resurse.** Za veliku većinu stanovništva vrijedi princip “neka tržište pobijedi”. Ograničimo prava, smanjimo i uništimo socijalno osiguranje, smanjimo propisani minimum zdravstvene zaštite- pustimo da sve to reguliše tržište. Međutim, to ne vrijedi za bogate. Za bogate je država jaka i važna i spremna uskočiti čim se nađu u nevolji, da ih izvuče iz finansijske krize, finansijske nevolje, finansijskog škripca. Država jača zajedno s ekonomijom, a to je ikona neoliberalizma. Mnogi državni programi u Bosni i Hercegovini koji se propagiraju kao entitetski državni i vladini poticaji su neka vrsta krave muzare iz koje je curio i curi novac. To vrijedi samo za bogate- dok za siromašne i dalje vrijede tržišni principi: ne očekujte nikakvu pomoć od države, država je problem a nije rješenje, itd. To je neoliberalizam, u svojoj biti posjeduje taj podvojeni karakter koji možemo slijediti unatrag kroz ekonomsku historiju. Jedna pravila vrijede za bogate a sasvim suprotna pravila vrijede za siromašne. Svjetska finansijska kriza 2008-2009. godine, a potom i kriza izazvana virusom COVID-19 2019. godine, definitivno su sahranile koncept neoliberalnog kapitalizma kao konačno pronađenu formu egzistencije čovjeka i društva. Logično je postaviti pitanje, kako će kapitalistički sistem izgledati u budućnosti? Mnogi ozbiljni naučnici su mišljenja kako mu budućnost nije svijetla – i kako mu život uopšte nije duga vijeka. Generalno i globalno pitanje je može li kriza, izazvana virusom korona, ubrzati proces koji je, zapravo, neumitan – proces prevladavanja kapitalizma kao sistema društvenih odnosa? Ili nešto slično... promjene sigurno slijede..., ako ne iz volje moćnika, onda sigurno iz ....carstva nužnosti... ka carstvu slobode...